



## CONVENIO DE COLABORACIÓN EMPRESARIAL ENTRE O CONCELLO DE CERCEDA E A SOCIEDADE GALEGA DO MEDIO AMBIENTE PARA O DESENVOLVEMENTO DE ACTIVIDADES DE INTERÉS XERAL

En la fecha de la firma digital

### REUNIDOS

**Dunha una parte**, o Ilmo. Sr. D. Juan Manuel Rodríguez García, en nome e representación do Excmo. Concello de Cerceda, actuando en calidade de Alcalde Presidente do mesmo, no exercicio das atribucións conferidas no artigo 21 da Lei 7/1985, de 2 de abril, de Bases de Réxime Local.

**E, doutra parte**, D. Javier Domínguez Lino, en nome e representación da Sociedade Galega do Medio Ambiente, actuando en calidade de Presidente da mesma, en virtude de acordo do Consello de Administración da Sociedade de data 30 de abril de 2025, polo que se autoriza a sinatura deste Convenio.

Ambas as dúas partes, recoñecéndose capacidade e representación suficientes para a subscripción do presente Convenio

### EXPOÑEN

Que a Sociedade Galega do Medio Ambiente, empresa pública adscrita na actualidade á Consellería de Medio Ambiente e Cambio Climático da Xunta de Galicia, veu subscribindo de forma habitual convenios de colaboración co Concello de Cerceda, habida conta de que, neste termo municipal, localízanse as principais instalacións de xestión de residuos urbanos de Galicia, integradas polo Complexo Medioambiental de Cerceda e o vertedoiro de Areosa.

Que ambas as dúas entidades públicas manteñen desde fai anos diferentes convenios de colaboración que permitiron, por unha banda, o completo desenvolvemento e funcionamento das instalacións que conforman o núcleo principal do sistema





institucional de xestión de residuos urbanos impulsado pola Xunta de Galicia, ofrecendo así unha solución integral á meirande parte das entidades locais da Comunidade e, por outra, permitiron a execución de múltiples actuacións e actividades que favoreceron e favorecen o desenvolvemento do Concello de Cerceda nas súas distintas dimensións, contribuíndo ao benestar e calidade de vida da veciñanza.

Así pois, a través da formalización de sucesivos convenios, propiciouse a posta en marcha de instalacións e actividades que aportan dinamismo ao municipio tales coma o xardín botánico, o parque acuático, o polígono industrial ou os centros e equipamentos deportivos. Así mesmo, Sogama tamén sae beneficiada destes acordos ao radicar preto das súas instalacións empresas de servizos que auxilian a súa actividade principal, reducindo custes, e posibilitando o desenvolvemento, no propio concello, de proxectos estreitamente relacionados coa calidade ambiental e a utilización de enerxías renovables, contemplados no seu obxecto social.

Na actualidade, Sogama xa ten culminada a ampliación do Complexo Medioambiental de Cerceda, así como a planta de compostaxe, situada no vertedoiro de Areosa, acadando a dobre finalidade de dispoñer da capacidade de tratamento necesaria para dar un mellor servizo a todos os concellos que apostaron polo sistema institucional de xestión de residuos da Xunta de Galicia, e conseguir elevar as taxas de recuperación de materiais e de reciclaxe. Igualmente, a empresa avanza cara ao vertido técnico cero, de tal forma que ao vertedoiro de Areosa só cheguen os rexeitamentos resultantes das liñas previas de tratamento de residuos.

Igualmente, cabe sinalar que Sogama licitou unha nova planta industrial para a clasificación e recuperación de residuos téxtiles, e que pretende ser un referente no sector polo novidoso da súa tecnoloxía, favorecendo ao mesmo tempo o emprego de persoal en risco de exclusión social. Este proxecto contribúe á consecución dos fitos e obxectivos do Compoñente C.12. do Plan de Recuperación, Transformación e Resiliencia (PRTR), concretamente ao Investimento 3 (C12.I3), cuxo bloque de actuacións desenvólvese mediante Acordo de Conferencia Sectorial de Medio Ambiente





do 24 de xullo de 2024, polo que se aproban os criterios de repartición e distribución territorial dos créditos relativos ao Plan de apoio á implementación da normativa de residuos.

Pero todos estes proxectos e iniciativas precisan da continua colaboración que, desde sempre, mantiveron Sogama e o Concello de Cerceda como administración local onde se asenta a infraestrutura industrial da empresa pública, tanto actual como futura. Refórzase así o necesario clima de harmonía entre as partes para que se siga a compatibilizar a actividade industrial de Sogama coa protección da contorna propia dun municipio eminentemente rural, sendo o desenvolvemento sostible do Concello, tanto na súa vertente económica como social e medioambiental, o obxectivo principal deste convenio.

Con tal fin, Sogama entende que debe seguir aportando recursos ao seu alcance para cooperar na mellora da contorna natural e social do municipio, e seguir favorecendo o seu crecemento económico, a xeración de riqueza e emprego estable. En definitiva, seguir mellorando a calidade de vida de todos os seus habitantes.

Deste xeito, Cerceda, como Concello que acolle as principais instalacións do sistema de Xestión Institucional de Residuos Urbanos promovido pola Xunta de Galicia, continúa a ser referente autonómico e exemplo de desenvolvemento industrial sostible e de boas prácticas ambientais, colaborando con Sogama para levar a bo termo o seu labor e axilizando, na medida das súas posibilidades, os trámites administrativos necesarios para a consecución dos seus fins.

Todo o anterior xustifica e fundamenta sobradamente o marcado interese público, social e económico que ten e persigue a formalización deste convenio.

Tendo en conta o anteriormente exposto, e co fundamento no principio de cooperación recollido no artigo 3 da Lei 40/2015, do 1 de outubro, do réxime xurídico do sector público, no artigo 193 da Lei 5/1997, de 22 de xullo, de Administración Local de Galicia





e o contido no artigo 25 da Lei 49/2002 de Réxime Fiscal das Entidades sen Fins de Lucro e dos incentivos ao Mecenado, as partes consideran necesario e moi positivo estreitar a súa relación mediante a fórmula dun novo convenio de colaboración que contribúa a manter unhas sólidas bases para a cooperación técnica, económica, social e medioambiental en beneficio do interese público. É por isto que:

## ACORDAN

### PRIMEIRO.- Obxecto

O obxecto deste convenio é a promoción da sostibilidade ambiental do Concello de Cerceda, de conformidade coas orientacións ditadas pola Consellería de Medio Ambiente e Cambio Climático da Xunta de Galicia, así coma o desenvolvemento sostible no seu conxunto, tanto a nivel económico como ambiental e social.

Así mesmo, é obxecto deste convenio a colaboración entre as partes para a correcta execución das actividades de xestión de residuos que realiza Sogama, así coma o establecemento dos mecanismos de compensación ao Concello de Cerceda polas posibles molestias que a súa actividade industrial poida orixinar.

### SEGUNDO.- Actuacións a realizar

- Continuar co apoio, intercambio de información e promoción de iniciativas que contribúan á mellora da contorna natural do concello, optimizando os seus recursos e favorecendo a mellora da calidade de vida de todos os seus habitantes.

Con tal fin, seguirase contribuíndo ao financiamento do mantemento e operación de instalacións municipais de marcado carácter social, cultural e medioambiental. É o caso do xardín botánico, paseos fluviais, áreas recreativas (algunha das cales era anteriormente un vertedoiro incontrolado), xardíns





municipais, aula da natureza, rutas de sendeirismo, depuradoras de augas residuais, instalacións de enerxías alternativas, ecomuseo, museo do moucho e museo da minería.

- Potenciación da educación, concienciación e sensibilización da cidadanía na protección do medio ambiente e a adopción de prácticas sostibles e saudables mediante a financiación de actividades deportivas e culturais impulsadas polo Concello; promoción do sistema de compostaxe doméstica coa pretensión de que os habitantes poidan fabricar o seu propio abono natural a partir da fracción orgánica dos residuos e biomasa das súas explotacións agrícolas, para ser aplicado de novo en hortas, xardíns e labores do campo.
- Apoio ao desenvolvemento industrial, económico e social do Concello mediante o financiamento do mantemento do viveiro de empresas, oficinas de emprego e desenvolvemento e posta en marcha de proxectos de innovación tecnolóxica ambiental.
- Plan de inspeccións periódicas polos técnicos do Concello ás instalacións do vertedoiro de Areosa, por ser esta infraestrutura a máis sensible dende o punto de vista ambiental. Así, o ente local terá acceso permanente ao vertedoiro para que os seus técnicos poidan realizar controis e inspeccións periódicas, previo aviso aos responsables de Sogama cunha hora de antelación, dando así debido cumprimento aos requisitos de seguridade estipulados para o persoal alleo ás instalacións.
- Axilización dos trámites administrativos necesarios para a consecución dos permisos e licencias necesarias na construción e posta en marcha dunha nova planta de clasificación e recuperación de residuos téxtiles, tendo en conta dos prazos limitados para executar as obras establecidos polo programa MRR.





### **TERCEIRO.- Obrigas do Concello.**

O Concello de Cerceda obrígase a realizar as actuacións sinaladas na cláusula anterior, contratando os medios humanos, técnicos e materiais necesarios para o idóneo desenvolvemento das actividades referenciadas, de acordo coa lexislación que lle resulte de aplicación e en especial a Lexislación de Contratos do sector público e a Lei de Bases de Réxime Local.

Dado o especial interese público dos labores de xestión de residuos que realiza Sogama, así coma o interese social e fomento do emprego local que supón a súa actividade, xustifícase a aplicación da bonificación do 50% do imposto sobre construcións, instalacións e obras, polo que o Concello aplicará a devandita bonificación ás licencias que precise Sogama para o desenvolvemento e ampliación das súas instalacións téxtiles

Dar publicidade na cartelería, folletos, anuncios ou calquera outro elemento con fins publicitarios que se empreguen para divulgar actividades ou investimentos financiados en todo ou en parte con cargo a este convenio, mediante a inclusión dos logotipos oficiais de Sogama e a Xunta de Galicia a fin de anunciar a participación como colaborador, de conformidade co establecido no artigo 25 da Lei 49/2002 de Réxime Fiscal das Entidades sen Fins de Lucro e dos incentivos ao Mecenado.

Xustificar os gastos realizados con cargo a este convenio de conformidade co procedemento establecido, prestando a súa colaboración e facilitando canta documentación lle sexa requirida no exercicio das funcións de control que corresponden a Sogama, á Intervención Xeral da Comunidade Autónoma e ao Consello de Contas.

Consentir expresamente a inclusión dos datos relevantes deste convenio nos rexistros públicos que proceda, de acordo co establecido no artigo 16 da Lei 9/2007 de subvencións de Galicia.





#### **CUARTO.- Financiamento**

Para financiar os gastos que se deriven da execución das accións contempladas na cláusula segunda, Sogama colaborará cunha achega económica máxima de 2.650.000 euros, con cargo aos seus orzamentos, e dividida nas seguintes anualidades e importes:

- Año 2025: 625.000
- Año 2026: 650.000
- Año 2027: 675.000
- Año 2028: 700.000

O aboamento das anteriores cantidades realizarase do seguinte xeito:

A anualidade correspondente a 2025 aboarase en dúas partes do 50%. A primeira, ao rematar o segundo trimestre do 2025, e, a segunda, ao rematar o cuarto trimestre de 2025.

As restantes anualidades aboaranse en dúas partes do 50%. A primeira, ao rematar o primeiro trimestre de cada ano, e, a segunda, ao rematar o terceiro trimestre de cada ano, emitindo o Concello a certificación á que alude o artigo 24 da Lei 49/2002, de 23 de decembro, de réxime fiscal das entidades sen fins lucrativos e dos incentivos ao mecenado, unha vez sexa efectivo por SOGAMA o aboamento.

#### **QUINTO.- Xustificación da achega**

Sen prexuízo das certificacións contempladas no artigo 24 da mencionada Lei 49/2002, no mes de decembro de cada ano de duración do convenio, o Concello remitirá a Sogama unha xustificación do investimento das achegas aportadas ao desenvolvemento das actuacións do convenio mediante a entrega da seguinte documentación:





- Memoria de actuación sobre as actividades levadas a cabo en cumprimento das accións previstas nos acordos deste convenio, que abranguerá o período correspondente ao ano que remata.
- Certificación emitida por persoa apoderada do Concello ou polo titular do órgano que teña atribuídas as facultades de control orzamentario que acredite a realización das accións previstas neste convenio, así coma o investimento da totalidade da achega anual na realización das devanditas accións e o pagamento efectivo das mesmas.

A non xustificación do gasto das achegas, ou a non utilización das mesmas á consecución dos obxectivos deste convenio, poderán dar lugar a revogación das doazóns feitas de conformidade co establecido no artigo 647 do Código Civil.

#### **SEXTO.- Establecemento dunha Comisión Mixta de Seguimento**

Para o bo desenvolvemento das actividades obxecto do Convenio establecerase unha Comisión Mixta, de composición paritaria, integrada por un representante de cada unha das institucións, á que corresponderá a concreción, seguimento, interpretación e avaliación das accións derivadas do presente convenio.

Nesta comisión actuarán como representantes, por parte do Concello de Cerceda, o seu Alcalde, ou persoas en quen delegue; e ,por parte de SOGAMA, o seu Presidente ou persoa en quen delegue.

Serán funcións desta Comisión de seguimento:

- 1.- Velar polo cumprimento do convenio.
- 2.- Concretar, seguir, interpretar e avaliar as accións derivadas do presente convenio.





3.- Adoptar ou propoñer as medidas necesarias para garantir o exercicio coordinado das competencias de cada unha das partes.

4.- Resolver os problemas de interpretación que poidan xurdir.

A Comisión reunirse como mínimo unha vez ao ano, no último trimestre de cada ano, ao fin de analizar as actuacións realizadas e fixar e determinar, de ser caso, obxectivos concretos e actividades a realizar na seguinte anualidade.

#### **SÉTIMO.- Inexistencia de relación laboral**

A subscrición do presente convenio non implicará relación laboral, contractual ou de calquera outro tipo entre os profesionais que realicen as actividades obxecto deste convenio e SOGAMA.

#### **OITAVO.- Dereitos de uso e propiedade industrial e intelectual**

Os dereitos de propiedade intelectual e industrial sobre a totalidade das creacións resultado deste convenio, son titularidade conxunta do Concello e de SOGAMA.

As partes necesitan a autorización expresa da outra para proceder á edición, representación, gravación e reprodución audiovisual, informática, ou por calquera outro medio, formato o soporte, do resultado e dos materiais froito do desenvolvemento do proxecto.

#### **NOVENO.- Modificación, Denuncia e Resolución do Convenio**

As partes poderán modificar ou resolver o presente convenio en calquera momento por mutuo acordo.





O incumprimento de calquera das obrigas contraídas no presente convenio por unha das partes facultará á outra para resolver o mesmo, cos efectos que legalmente procedan.

#### **DÉCIMO.- Réxime xurídico e resolución de conflitos**

O réxime Xurídico se configura como un convenio de colaboración empresarial en actividades de interese xeral de mecenado, regulado polo artigo 25 da Lei 49/2002 de Réxime Fiscal das Entidades sen Fins de Lucro e dos incentivos ao Mecenado, aplicándose de xeito supletorio a Lei 9/2007 de subvencións de Galicia, e concretamente os artigos 5.2, e 16 e a disposición adicional cuarta.

Este convenio ten natureza privada, rexéndose polas normas de dereito privado e, no seu defecto polas normas de dereito administrativo.

As cuestións litixiosas que poidan xurdir na interpretación e cumprimento do presente convenio de colaboración, serán de coñecemento e competencia da Orde xurisdicional civil.

#### **UNDÉCIMO.- Publicidade**

A sinatura do presente convenio suporá o consentimento expreso das partes asinantes para incluír e facer públicos os datos persoais que consten no convenio, e mailo resto de especificacións contidas no mesmo, de conformidade co artigo 15 da Lei 1/2016, do 18 de xaneiro, de transparencia e bo goberno (DOG nº 30 do 15 de febreiro), o Decreto 126/2006, do 20 de xullo, polo que se regula o rexistro de convenios da Xunta de Galicia (DOG nº 149 do 3 de agosto) así como o establecido no artigo 16 da Lei 9/2007 de subvencións de Galicia, en relación co artigo 18 da Lei 38/2003, Xeral de Subvencións, que establece a Base de Datos Nacional de Subvencións (BDNS).





### **DUODÉCIMO.- Vixencia.**

O presente convenio estenderá a súa vixencia dende a data da sinatura ata o 31 de decembro de 2028, sen posibilidade de prórroga.

Este acordo de colaboración obriga ao cumprimento do expresamente pactado, someténdose as partes ao acordado en tódalas estipulacións, e como proba de conformidade subscríbese, por triplicado exemplar, no lugar e data arriba indicados.

Polo Concello de Cerceda

Pola Sociedade Galega do  
Medio Ambiente, S.A.,

O alcalde

O presidente

D. Juan Manuel Rodríguez García

D. Javier Domínguez Lino

